

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXIV No. 8  
Mayo 21, 2003  
[www.philippinerevolution.org](http://www.philippinerevolution.org)

*Editorial*


# Suportahan ang paghimakas sang pumuluyong Moro batuk sa nagasingki nga atake sang rehimeng US-Arroyo!

**P**AGKATAPOS gindeklarar nga "terorista" sang US kag sang rehimeng Arroyo ang Partido Komunista sang Pilipinas kag Bag-ong Hangaway sang Banwa, ang Moro Islamic Liberation Front (MILF) naman subong ang gusto nila bilangon sa ila listahan sang mga "terorista." Pormalidad na lamang ini bangud sa buhat sang US kag sang rehimen madugay na nila ginakabig nga "terorista" ang MILF. Ginapabugal pa sang rehimen Arroyo nga indi na kinahanglan ideklara nga terorista ang MILF agud makakuha sang pondo sa US kag padayunon ang todo-gera batuk diri sa idalum sang palso nga "gera kontra-terorismo" sang imperyalismong US.

Maathag ang plano sang huyog nga ini. Ini agud hatagan-rason ang dugang pa nga armadong interbensyon sang US, nga plano sining umpisahan paagi sa pagpadala sang mga Amerikanong tropa pangkombat sa mga lugar nga ginahulagan sang MILF sa Mindanao, luwas pa sa mga lugar sang bandidong Abu Sayyaf. Sa ulihi sakupon pati na ang mga teritoryo sang Bag-ong Hangaway sang Banwa.

Agud may ara sang sandigan ang deklarasyon nga "terorista" ang MILF, ginahimo sang US paagi sang *terrorist cell* sini sa Pilipinas ang serye sang mga pagpangbomba sa nagkalain-lain nga lugar sa Mindanao. Ginkumplot diri si Defense Secretary Angelo Reyes. Makangingil-ad ang sunod-sunod nga pagpangbomba sa mga syudad sang Davao kag Koronadal halin Marso tubtub Mayo. Masobra 50 inosenteng sibilyan ang namatay kag ginatos-gatos ang napilasan sa mga teroristang atake nga ini.

Gilayon ginpagguwa sang rehimen ang akusasyon nga ang mga pagpangbomba kahimuan sang magkahimbon nga MILF-BHB-Abu



***Mga tampok  
sa isyu na ini...***

**Bt Corn: makahililo  
nga mais sg Monsanto**  
PAHINA 3

**Ka Elvira,  
mapinalanggaon nga  
rebolusyonaryo**  
PAHINA 6

**Tabingi nga dalan  
padulong sa kalinu-  
ngan sa Palestine**  
PAHINA 7

Sayyaf. Gintapalan sini ang akusasyon agud halughugon ang mga komunidad sang Moro sa Davao kag Koronadal kag mangdakup sang mga sibilyan. Ang iban sa ila wala pa gihapon makit-an tubtub subong. Sa kumpas sang militar kag pulisya, tatlo ka Moro ang ginpangluthang sang mga elemento sang Davao Death Squad sining Mayo 10, pila ka metro lamang ang kalayuon sa isa ka detatsment sang PNP sa Sasa, Davao City.

Tuyo man sang dugang nga pagpresyur kag pagpamahug sa MILF nga pwersahon ini nga magpirma antes matapos ang 2003 sa isa ka "pinal nga kasugtanan pangkalinungan" nga bangian nga ginbalay sang GRP kag wala sang iban nga unod kundi ang pagsurender sang MILF sa rehimen. Ginkutdan sang rehimeng Arroyo ang MILF sang tubtub Hunyo 1 lamang agud isurender ang mga tinawo sini nga responsable kuno sa mga pagpangbomba kag hayagan magdeklara nga pabor ini sa mga prekundisyon sang rehimen sa sugilanon pangkalinungan. Kon indi lubos nga ideklarar sila nga "terorista" kag igasarado na ang sugilanon pangkalinungan.

Ang matuod, sadto pang Disyembre 2002 ginpasingki na sang AFP ang mga operasyon militar batuk sa MILF agud piliton ini magpaidalom sa balayon sang kapitulasyon nga gusto sang gubyernong Arroyo. Ginarason pa sadtong una sang AFP nga ang ila mga panibag-ong atake may kaangtanan sa paglagas sa kriminal nga Pentagon gang. Biktima na naman sa mapintas nga kampanya ang gatos libo nga inosenteng sibilyan nga napilitan mag-ebakwet agud maglikaw sa mga pagpangbomba kag pagpanalakay sang AFP.

Sadtong Abril 2, pila ka oras pagkatapos ang isa ka *peace rally* nga ginlunsar sang mga organisasyong Moro nga nagakundena sa terorismo kag nagasuporta sa liwat nga pagbukas sa sugilanon pangkalinungan, maluibon nga ginhimo sang mga operatibang pangsaywar sang US kag AFP ang pagpangbomba sa dulungkaan sang Davao.

Gingamit ini agud liwat ipaypay ang mga mandamyento de aresto para kay Hashim Salamat, tagapamuno sang MILF, kag iba pang lider sini. Sining Mayo 17, ginmandu ni Arroyo ang dugang



nga pagpangbomba sa Mindanao sa mga lugar nga ginakutaan kuno sang mga "terorista"-buot hambalon mga komunidad sang Moro. (*Lantawon ang kaangot nga artikulo sa pahina 3.*)

Sa gihapon wala mapaluhod ang MILF kag tigaylo ginpansanyog ang ila rebolusyonaryong armadong paghimakas.

**G**inapakita sang tanan nga ini nga indi ang MILF kundi ang US kag AFP amo ang mga tunay nga terorista. Ilakip man nila ang MILF sa ila listahan sang mga "terorista," nagapabilin nga lehitimo kag matarung ang paghimakas sang MILF kag sang pumuluyong Moro para sa kaugalingon-nga-pagdedisyon batuk sa pungsodnon nga pagpamigos. Husto ang ginahimo sang MILF nga maglunsar sang mga atakeng gerilya batuk sa reaksyunaryong militar agud pangapinan ang ila mga kadalag-an, batuan ang kampanya sa pagtapna sang AFP kag isulong ang paghimakas sang pumuluyong Moro. Maayo kag hugot nga ginakaptan sang MILF ang ila mga armas sa atubang sang teroristang pagbansag diri. Ini kag ang padayon nga pagpasulong sang pumuluyong Moro sa iban pa nga patag sang paghimakas ang magaserbi nga taming sa ginalauman nga pagsingki pa sang brutal nga mga kampanyang pagtapna sang GRP kag AFP kag labing pagsingki sang armadong interbensyon sang US.



Tuig XXXIV No. 8 Mayo 21, 2003

Ang **Ang Bayan** ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

**[www.philippinerevolution.org](http://www.philippinerevolution.org)**

Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: **[angbayan@yahoo.com](mailto:angbayan@yahoo.com)**

## Kaundan

<b>Editorial</b>	<b>1</b>
Pagpangbomba sa Mindanao	<b>3</b>
Bt corn: makahililo nga mais sg Monsanto	<b>3</b>
Gubyerno, wala batu sa SARS	<b>4</b>
Ka Elvira, mapinalanggaon nga rebolusyonaryo	<b>6</b>
Tabingi nga dalan padulong sa kalinungan sa Palestine	<b>7</b>
<b>Balita</b>	<b>8</b>

Ang **Ang Bayan** ginabantala duha ka beses kada bulan sang Komite Sentral sang Partido Komunista sang Pilipinas.

## Pagpangbomba sa Mindanao Pabugal sang rehimen sa US

Gilayon nga ginpatuman sang AFP ang mandu ni Gloria Macapagal-Arroyo nga pagpangbomba sa mga lugar nga ginakutaan kuno sang MILF sa Mindanao. Ini agud magpabugal siya sa iya imperyalistang amo nga ginabisita niya subong, sa paglaum nga makakuha sang daku-daku nga ayuda.

Sining Mayo 18, ginsuguran sang AFP ang halos bilog nga adlaw nga pagpangbomba kag paglusob sa North Cotabato, Lanao del Norte, Maguindanao kag Zamboanga peninsula. Sa unang duha ka adlaw pa lamang, nag-abot na sa masobra 30,000 libras (o masobra 13,500 kilos) sang mga bomba ang ginhulog sang mga eroplano nga OV-10 Bronco sa Lanao del Norte kag Zamboanga. Tatlong libo dugang nga tropa pa ang ginkuha sa Luzon kag Visayas agud ipadala sa Mindanao. Nagaabot na sa 318,000 pumuluyo sa Zamboanga del Norte kag 30,000 sa Lanao del Norte ang napilitan mag-ebakwet bangud sa ginpasingki nga kampanya militar.

Gilayon man ginhambal ni Presidente George W. Bush sang US nga dugangan ang mga tropang Amerikano nga nagapasakup sa Balikatan sa Mindanao. Nagpromisa man siya dugangan ang ayuda sa AFP para sa mga operasyon sini batuk sa MILF. Samtang, gin-anunsyo sang White House nga ang masunod nga target pagkatapos sang MILF amo ang BHB.

Nag-ani sang pagpakamalaut ang mga operasyon militar. Suno kay Gregorio "Ka Roger" Rosal, tagapamaba sang Partido Komunista sang Pilipinas, ini ang direkta nga pag-atake sa mga komunidad sang Moro. Siling niya, mandu ini sang militarista kag idu-idu nga si Arroyo nga gusto magsipsip kag maghatag sang regalo sa ginabisita niyang amo.

Walo ka senador lakip ang pila nga kapartido ni Arroyo ang nagakontra subong sa nagapadayon nga kampanya militar sa Mindanao. Suno kay Sen. Aquilino Pimentel, ang pagpangbomba wala sang iban kundi "terorismo nga ginasakdag sang estado."

Ginsaway man ni Fr. Angel Calvo sang Coalition of Mindanao Peace Advocates si Lt. Gen. Kyamko, hepe sang Southern Command sa pahayag sini nga wala sang nagakatabo nga gera sa Mindanao kundi "pagpanghulog lamang sang mga bomba kag pagpanganyon..."

AB

## Bt corn: makahililo nga mais sg Monsanto

"Iboykot ang Bt corn!" mabaskog nga panawagan sang Kilusang Magbubukid ng Pilipinas (KMP) sa nakatalana nga pagtanum kag komersyal nga pagpalapnag sa pungsod subong nga Mayo sang *genetically modified* nga mais nga produkto sang Monsanto, isa ka higante nga agro-kemikal nga kumpanyang multinasyunal.

Padayon nga ginapasingki sang mga militanteng mangunguma ang ila pagpamatuk sa paghatag permiso sang Bureau of Plant Industry (BPI) sa Monsanto. Ginapamatukan nila sadto ang *field testing* sang Monsanto sa Bukidnon, Isabela, Camarines Sur kag South Cotabato. Tampok sa ila paghulag amo ang paggabot sa mga binhi sang Bt corn sa nagkalain-lain nga lugar sadtong 2001.

Kaangot sini, ginabuyok subong sang KMP sa Kongreso nga aprubahan ang tatlo ka hagna nga



ginpasa sang mga representante sang Bayan Muna. Tuyo sang isa sini, ang HB No. 3381, nga

suspendihon ang pagpasulod, paghimo sang *field testing* kag pagpalapnag sang

mga *genetically modified organism* (GMO) sa pungsod samtang wala pa sang lubos nga pagtasa sa kasiguruhan kag pagsunod sini sa mga pagsunlundan sa ikaayong lawas kag pag-amlig sang kapalibutan.

Luwas sa mga tiglawas sang Bayan Muna, nagpahayag man sang suporta sanday anay Sen. Wigberto Tanada, mga Katoliko nga arsobispo sang Iloilo kag Bohol, Sen. Bob Brown sang Australia, Andrew Halaram (anay US Peace Corps *volunteer*), mga artista, akademiko, siyentista kag pila ka mamalidha sa 30 adlaw nga pag-ayuno (*hunger strike*) sang pila ka lider mangunguma kag *environmentalist* sa atubang sang upisina sang Department of Agriculture. Nagsugod ang *hunger strike* sadtong Abril 22 kag natapos sining Mayo 21.


Sumuporta man ang Catholic Bishops Conference of the Philippines, Association of Major Religious

Sundan sa "Bt Corn," pahina 4

# Gubyrno, wala batu sa SARS

Indi handa ang reaksyunaryong gubyrno batuk sa pagpanghalit sg ano man nga epidemya bangud indi sini prayoridad ang pag-amlig sa ikaayong lawas sg pumuluyo

**BADYET SA  
KALUSUGAN,  
DAGDAGAN!**



Pila ka bulan na nga nagalapta sa nagkalain-lain nga pungsod ang makalalaton kag wala pa bulong nga balatian nga SARS ukon Severe Acute Respiratory Syndrome. Sintomas sang sakit ang mataas nga hilanat nga mahimo updan sang pagpalangurog, pagpalanakit sang lupalutahan kag pagpanghina. Sa sulod sang duha tuhtub pito ka adlaw pagasundan ini sang mala kag mabaskog nga pag-ubo, kag sa ulihi mabudlayan sa pagginhawa, nga mahimo ikamatay.

Masobra 3,000 na ang nalista nga kaso sa nagkalain-lain nga pungsod kag halos 600 na ang namatay pag-abot sang Mayo. Una nga ginreport ang balatian sadtong 2002 sa China kag lumapta ini sa Hongkong kag iba pang mga pungsod pag-abot sang tuig nga ini.

*Sundan sa "Gubyrno," pahina 5*

## **"Bt Corn," halin sa pahina 3**

Superiors of the Philippines kag College Editors Guild of the Philippines. Bilang pakig-unong, nag-ayuno man ang 1,000 mangunguma sa Los Banos, Laguna kag masobra 500 sa Leyte, Negros kag Iloilo. May mga aksyong suporta man sa Baguio City, Davao del Sur, South Cotabato kag Caraga.

**Peste sang pumuluyo.** Ang *genetically modified engineered* nga mais sang Monsanto, nga mas kilala sa marka nga YieldGard, may dala nga *gene* sang mikrobyo nga *Bacillus thuringiensis* (Bt). Ang *gene* sang Bt amo ang nagahatag sa mais sang ikasarang magtuga sang hilo batuk sa peste nga *Asiatic corn borer*.

Bisan matuod nga sa umpisa ang Bt corn makapatay sa *Asiatic corn borer*, mahimo man sini mapatay pati ang mga indi makahalalit nga sapat-sapat kag iban pa. Sa

kaulihanan, mismo ang *Asiatic corn borer* ang mahimo magaangkon man sang resistensya batuk sa Bt corn gani mas mangin mabudlay ang pagpatay sini. Mas malain pa, ang mga tumanduk nga klase sang mais sa palibot mabinhian kag masampawan sang Bt corn. Bangud gindisenyo ang Bt corn nga indi makuhaan sang binhi, ang mga mangunguma obligado magbakal sang binhi sa Monsanto kada tig-talanum.

Mabatyagan na subong sang mga mangunguma sang US kag Mexico ang amo nga makahalalit nga epekto bangud nauna nga ginpalapnag ang Bt corn sa ila mga pungsod. Ginatun-an ang pila ka indikasyon nga ang malain nga epekto sa ikaayong lawas sang tawo pareho sang kanser sa tiyan kag tinai, mga depekto sa pagbata kag sakit sa nerbyos bunga sang mga produktong GMO.

**Mga pagpamalabag sa iban nga pungsod.** Bunga sang mga negati-

bo nga epekto sini, ang mga pungsod sa European Union kag sa Asia (maluwas sa Pilipinas) ang nagpatuman sang moratoryum batuk sa pagpalapnag sini. Ginpauntat na nila ang pag-angkat sang GMO nga mais, soya at bulak sa US kag Canada umpisa pa sadtong 2000. Nagpanaog man ang Tasmania, isa ka estado sang Australia, sang lima ka tuig nga moratoryum batuk sa mga produktong GMO.

Mismo sa US subong mabaskog ang pagpamatuk sang mga myembro sang American Corn Growers Association sa GMO. Ginahingyo nila sa US Environmental Protection Agency nga pamensaron sang maayo ang pagdesisyon nga tugutan liwat ang Monsanto nga magbaligya sang Bt corn.

Sa pihak sang nagasingki kag nagalapad nga protesta, padayon gihapon ang plano sang rehimeng Arroyo sa komersyal nga pagpapadamu kag pagbaligya sang Bt corn kag iban pang produktong GMO. AB



Sa Pilipinas, may nagtuhaw na nga pila ka kaso sang SARS. Pero pilit gihapon ginahambal sang rehimen nga wala sang dapat ikakulba.

Nakulbaan kaayo ang gubyrno nga mabalita nga kalakip ang Pilipinas sa mga pungsod nga may SARS. Nagapangulba ini nga mabuhinan ang numero sang *overseas contract workers* (OCW) kag ang ginapadala nila nga mga remitans sa Pilipinas kon pagahugton sang iban nga pungsod ang pagsulod sang mga Pilipino nga OCW bangud sa kakulba sa SARS. Sining karon lang, ang Libya, Bahrain, Turkey kag Singapore kon sa diin nagatrabaho ang maabot sa pila ka pulo ka libong OCW, nagdumili na sa pagpasulod didto sang mga Pilipino bangud sa mga nabalitaan nga kaso sang SARS sa pungsod. Nagakabalaka man ang rehimen nga labi pa nga maglugdang ang turismo kag labing magagamay ang dumuluong nga pamuhunan.

Ang matuod nga mas pangunahon sa rehimen ang desperasyon nga magkita sang dolyar sangsa ano nga tikang sang paghalong. Halimbawa, butong-sulong ang gubyrno sa polisiya sini bahin sa mga Pilipino nga gusto magtrabaho sa mga lugar nga grabeng gin-igo sang SARS, pareho sang Hongkong. Sadtong Marso ginanunsyo sang gubyrno nga igabawal anay ang pagpadala sang mga mamumugon sa Hongkong. Ugaling madasig man nga ginbawi ang deklarasyon nga ini. Ini bangud sa kulba sang nabuhinan ang remitans sang dolyar nga nagabuhi sa ekonomya sang Pilipinas kag bangud man sa reklamo sang mga gusto magtrabaho sa Hongkong. Magapasimpalad na lamang sila sa SARS, siling nila, sa baylo nga mamatay diri sa gutom.

Ang matuod, wala gid man sang maayo nga programa ang reaksyunaryong gubyrno agud atubangon ang isa ka epidemya pareho sang SARS ukon ano man nga malala nga balatian nga nagahalit sa pungsod. Ginapabugal sang rehimen ang awtomatiko nga pagtalana sini sang P1.5 bilyon para sa mga programa kontra-SARS. Pero gamay ini ikumparar sa daku nga kinahanglanon para sa ikaayong lawas sang pumuluyo. Ginakwestyon man subong sang pila ka senador kon diin nagkadto ang pondo bangud tuhtub subong wala pa sila sang nakita nga signipikanteng pag-uswag sa mga kagamitan kag programa kontra-SARS. Nagtumod ang rehimen sang isa ka pasilidad (ang Research Institute for Tropical Medicine ukon RITM) nga magakonsentra sa pagtatap sang mga biktima sang SARS, ugaling ini may singkwenta ka katre lamang. Ang ibang pasyente sang RITM nga may iban pang malala nga balatian nga amo ang ginakabisar sang RITM pilit ginpasaylo sa ibang ospital.

Ang mga mamumugon medikal sa pangpublikong sektor nga ginasaligan direkta magatatap sa mga pasyente nga may SARS kag kalakip sa pinakabulnerable sa balatian nga ini, kulang katama sa proteksyon. Daku ang kakulangan sa mga N95 *mask* (*surgical mask* nga nagasala sang mikrobyo) nga ginaisyu sa ila. Kulang man ang kagamitan, bulong kag tinawo sa mga pangpubliko nga ospital. Bangud sa kakulangan sa tinawo, nahitad katama sa trabaho ang mga mamumugon medikal sa gubyrno. Sa pihak sini, manubo ang ila sweldo, kag san-o man wala ginabahinan sang gubyrno sang pondo ang ila mga benepisyo pareho sang *hazard pay*, *overtime pay* kag *night shift differential pay*. Nagapabilin nga makaluluoy

ang kahimtangan nga ini sa pihak sang pamahug sang SARS.

Sa kamatuoran, halos wala proteksyon ang mga mamumugon medikal batuk sa ano man nga balatian. Kon dungguon sila sang balatian, ginapabudlayan pa ang pag-utang sa Government Service Insurance System bisan may kaang-tanan sa pagtungod sang ila trabaho ang ila balatian.

Mayorya sang pumuluyong Pilipino ang bulnerable sa madamo nga balatian luwas sa SARS, bangud sa hayag nga pagpabaya sang reaksyunaryong gubyrno. Subong nga tuig, P9.9 bilyon lamang ang badyet sang gubyrno para sa bilog nga Department of Health, katumbas sang 1.2% sang kabilugang badyet nga P804 bilyon. Sa pihak nga bahin, P48.6 bilyon ukon 27.7% sang badyet nakatalana sa bayad-utang.

Dugang lamang ang wala pa sang bulong nga SARS sa mga peligro nga ginaatubang sang madamo nga Pilipino nga nagabalatian kag nagakamatay bangud sa simple, madali likawan kag may bulong nga mga balatian pareho sang tuberkulosis (TB), malarya kag dengue kag bisan ang paglupot lang.

Trenta milyon nga Pilipino ukon 30% sang populasyon ang may TB kag 75 ang nagakamatay diri adlaw-adlaw samtang nadula na ang balatian nga ini sa mauswagon nga pungsod. Problema medikal ang malarya sa 66 ukon 84% sang mga probinsya sa pungsod. Halos kada duha ka tuig may epidemya sang dengue sa mga syudad kag banwa. Lunsay mga imol nga wala ginatatap sang gubyrno ang mga biktima sini.

Siling sang mga nagaprotesta nga mamumugon medikal, SARS matuod ang kabangdanan sang tanan nga ini-ang Severely Anemic Resources for Health Services ukon grabe nga kakulangan sang resorsa para sa serbisyo pangmedikal. **AB**

# Ka Elvira, mapinalanggaon nga rebolusyonaryo

**S**ining Mayo, ginsabwag sang mga Pulang hangaway sa mga binukid kag kapatagan sang rehiyong Ilocos-Cordillera ang mga abo ni Ka Elvira-beterana sang rebolusyon kag mapinalanggaon nga kaupod.

Nakilala siya sa iya mabaskog nga pagkadlaw. Mahumok ang tagipusuon sa mga kaupod sa prente. Beterana. Angkon niya ang mga kinaiya nanday Tandang Sora kag Gabriela Silang.

Si Ka Elvira ukon Isabelita del Pilar, isa sa mga labing una nga kaupod nga naghulag sa rehiyong Ilocos-Cordillera, namatay bangud sa malala nga balatian sadtong Abril 13, 2003. Antes mamatay, katapu siya sang Komiteng Rehiyon sang Partido sa Ilocos-Cordillera umpisa 1998 kag nadispuisyon sa hilikuton pinansya.

Bisan grabe na ang ginabatyag nga balatian bunga sang iya sunod-sunod nga operasyon kag indi mag-epekto nga bulong, sa pamensaron gihapon niya ang mga kaupod kag ang ila kaayuhan.

Nagahibi siya kon kulang ang panggastos sang mga kaupod kag pamilya nila nga ara mga prenteng gerilya. Matinugahon siya sa pagpatuhaw sang pinansya kag kagamitan para sa mga kaupod. Patimanan sang iya paghatag igtalupangud, masami nagapadala siya sang iya kaugalingon nga luto sa mga kaupod labi na sa sona sang Abra kag Ifugao nga madugay niya nahulagan.

Sa eskwelahan, "beauty and brains" siya kon tawgon. Malayotani ang naabtan niya sa burges nga pagpangabuhì, ugaling ginpili ni Ka Elvira ang mag-alagad sa masa. Siya ang labing una nga

estudyante nga sinipa sa eskwelahan bangud sa aktibismo. Pila ka beses siya nga gindakup kag nakig-lagsanay sa militar sa mga welga kag demonstrasyon. Isa siya sa mga una nga nag-organisa sa kubay sang mga mamumugon kag masaming kaupod sa mga picket-layn kag welga.

Si Elvira isa sa mga una nga estudyante nga nagsabat sa panawagan nga magkadto sa kaumhan.



Nagserbi siya bilang organisador kag sang ulihi nagpatapu sa BHB antes ang pagpanaog sang layi militar. Nagkadto siya sa isa ka sonang gerilya sa Abra sadtong 1973. Bag-o gid lang nga bukas ang sona nga ini kag wala pa sang eksperensya sa pagtukod sang mga sona ang

mga kaupod nga gindeploy sadto. Gin-atubang nila ang pagtambak sang madamo nga pwersa militar bangud ini ang ginharian sang mga warlord-pulitiko nga si Carmelo Barbero, *defense undersecretary* sadto sang pasistang si Marcos.

Madamo nga taga-Malibcong, Lacub kag Tineg ang tubtub subong naga-estorya bahin sa wala kakapoy nga pag-atipan niya sa mga balatian sadtong nagluntad ang epidemya sa lugar nila. Wala maglapta ang epidemya bangud, sa pagpanguna ni Ka Elvira, gintun-an sang mga kaupod kag masa ang mga posibleng kabangdanan kag bulong sa balatian. *Medical officer* siya sadto sang yunit sang BHB nga nagahulag didto. Ginabaktas

niya ang kagulangan bisan gab-i kag nagaulan, makahatag lang sang temporaryo nga bulong sa mga nagabalatian. Isa ka estorya nga indi nila sadto malimtan amo ang isa ka bata nga mataas ang hilanat nga indi makaginhawa. Ginsupsop ni Ka Elvira ang sip-on nga nagabara sa ilong sang bata para lang makaginhawa ang bata.

Nadakpan siya sadtong 1974 kag sa prisohan ginbun-ag ang iya panganay. Sang mahilway sadtong 1976, sa Ifugao naman siya naghulag. Sa isa ka misyon para sa pagpasulod sang mga baril kag bala sa Ifugao sadtong 1978, nahulog sa pil-as kag naglupok ang ila salakyan kag grabe siya n ga napilasan. Sa ospital liwat naman siya nadakup. Sang makagguwa sadtong 1980, gilayon siya nga bumalik sa Ifugao, bisan pa ang isa ka бага wasak na kag ang pila ka gusok bali bangud sa aksidente.

Sa Ifugao, bal-an kaayo sang masa kon nag-abot ang yunit nanday Ka Elvira bangud pag-abot nila halin sa kaingin, may luto na nga sud-an kag malimpyo ang balay. Wala siya nadulaan sang buot sa naagyan nga mga kabudlayan sa pagbukas sang sonang gerilya kag nagserbi siya nga inspirasyon sa mga bag-ong saka nga gerilya kag sa masa. Malipayon siya nga nag-alagad sa masa, nag-organisa kag naghatag sang mga pangpulitikang pagtuon. Wala niya ginakalipatan ang pagasikaso sa ikaayong lawas kag pag-sakdag sa pang-ekonomya nga kaayuhan sang masa didto, labi na sa kahimtangan nga ang Ifugao ang isa sa mga prubinsya nga pinakamabudlay kag pinakabinayaan sang reaksyunaryong gubyerno.

Kilala nga palasugilanon si Ka Elvira. Ginapaambit niya ang mga estorya bahin sa inagihan nila sa

---

*Sundan sa "Ka Elvira," pahina 7*

**ANG BAYAN** Mayo 21, 2003




# Tabingi nga dalan padulong sa kalinungan sa Palestine

**B**aliskad katama sa ginapakita nga pagkabukas sang Palestine, padayon nga nagapamalibad ang gubyernong Israeli nga maghimo sang mga kinahanglanon nga tikang padulong sa paglubad sang pila ka dekada nga inaway Palestine-Israel. (*Lantawon ang kaangot nga artikulo sa nagtaliwan nga isyu sang AB.*)

Nagapakumplaser lamang si Ariel Sharon, punong ministro sang Israel, sa paghambal nga halugan na ang kontrol sini sa pumuluyong Palestino. Wala man untat sa gihapon ang pag-atake, pagpanakop sa mga syudad, pagpang-ipit kag pagpamintas sang mga pwersang Israeli sa pumuluyo sang Palestine. Wala gihapon ginapauntat, kundi ginarason pa sang gubyerno sang Israel ang pagpalapad sang mga kolonya sang Israeli sa sulod sang Palestine.

Ang pinakabag-o nga "solusyon" nga ginapresentar sang "roadmap" nauna na nga ginbululigan himuon sang gubyernong US kag mga tiglawas sang Israel, amo gani nga hungod nga bangian ini kontra sa interes sang Palestine.

Pinakapunta sini kuno ang ginahandum nga hilway nga kaugalingon nga estado sang Palestine nga posible kuno matukod na sa 2005. Pero antes matukod ini, kinahanglan mapun-an anay sang Palestine ang madamo nga mabug-at kag banggian nga mga kundisyon. Mahim-os man ini, isa ka hilaw kag di-independyente nga estado ang resulta bangud pasilabtan kag pagadesisyunan sang *Quartet* (US, United Nations, European Union kag Russia-ang grupo nga nagakomposar sang "roadmap") ang tanan nga aspeto sa pagtukod



sang estado sang Palestine: ano nga gubyerno ang igatukod, paano ini tukuron, sin-o ang pagapilion diri, paano sila pagapilion, ano ang mangin polisiya sang estado, paano ini paandaron kag iban pa. Paagi sa "roadmap" kag sang *Quartet*, ginalatag sang US ang wala-untat nga pagpasilabot sini sa mga internal nga halambalanon sa Palestine.

"Posible" kuno nga mas temprano pa sang 2005 matukod ang "independyenteng estado" sang Palestine, pero ini kon amo man ka temprano mapatuman sang Palestine ang tanan nga mga kundisyon nga napahamtang diri. Sa ano pa man, "temporaryo" lamang ang mga dulunan sang "estado" kag may pila lamang nga "pila ka kinaiya" (*attributes*) sang soberanya kag mapaidalom gihapon ini sa superbisyon sang *Quartet*.

Sa pihak nga bahin, sa mga ginsakop lamang humalin Marso 2001 gintumod nga maghalin gilayon ang mga Israeli. Ang paghalin sang mga mananakop sa mga teritoryo nga gin-okupar humalin Septyembre 2000 tubtub Marso 2001 nagadepende kuno sa "security performance" ukon pagsabat sang Palestine sa kundisyon nga magdisarma. Luwas sini, wala sang maathag nga probisyon nga nagatakda sa Israel nga ibalik sa Palestine ang mga teritoryo nga ginsakop antes ang Septyembre 2000.

Ginapagguwa sang "roadmap" nga ang aksyon sang mga pwersang militar sang Israel pagdepensa-sa-kaugalingon kag reaksiyon lamang sa paghulag sang mga Palestino. Wala pagkilala sa kamatuoran nga ang kalakasan, iligal kag imoral nga okupasyon sang Israel sa Palestine ang nagtulod sa mga Palestino nga ipakigbatu ang ila mga kinamatarung.

AB

## "Ka Elvira," halin sa pahina 6

pagtukod sang mga sonang gerilya, mga kagarukan nanday Conrado Balweg kag mga kahimbon sini nga nagtukod sang CPLA kag mga problema nga ginbunga sang pagtraidor sang mga ini kag ang pila ka beses nga paghunong sa iya (Camp Dangwa, Camp Olivas kag Camp Bagong Diwa) nga masami ginabal-utan sang mahagpok niya mga kaladlawon.

Sa sulod sang 32 tuig nga ginbuhos sa hublag, isa siya ka huwaran sang rebolusyonaryo nga kagpagsik, kalig-on kag mataas nga panimuot nga makig-away. Sa panahon sang Ikaduha nga Dungganon nga Kahublagan Pagpanadlong, nag-alagad siya sa mga naghina ang buot kag nagbulig sa pagkuha sang manggaranon nga leksyon sa mahaba nga rebolusyo-

naryong inagihan nga ginpasakup-an niya.

Permi niya ginasambit nga "Nagumpisa ang hublag sa halos wala. Nag-entra kami sa BHB nga wala eksperensya sa pagkapot sang armas ukon magtukod sang soang gerilya. Bitbit lang namon ang rebolusyonaryong teorya kag ang pagsalig nga may bag-o nga buasdamlag para sa pigos nga pumuluyo."

AB

## Himbunanay sang militar kag Abu Sayyaf, ginbuyagyag ni Burnham

GINKUMPIRMA ni Gracia Burnham, isa ka Amerikanang misyonera nga sobra isa ka tuig nga bihag sang Abu Sayyaf, ang madugay na nga himbunanay sang mga upisyal sang AFP kag sang teroristang grupo.

Sa ginsulat niya nga libro *In the Presence of My Enemies* (Sa Luyo sang Akon mga Kaaway) nga ginpagguwa sa US sining una nga simana sang Mayo, ginbuyagyag ni Burnham nga nag-ayuanay ang isa ka heneral sang AFP kay Abu Sabaya, isa sa mga lider sang Abu Sayyaf, sa partehanay sa ransom sang mga bihag. Wala madayon ugaling ang partehanay bangud sa daku ang gusto nga porsyento sang heneral.

Ginsugid man ni Burnham nga ang AFP mismo ang nagasuplay sa Abu Sayyaf sang bulong, bugas kag iban pang pagkaon. Ginabilin lang kuno ini sang mga suldao sa higad sang mga dalan nga ginaagyan sang Abu Sayyaf nga malapit sa mga detatsment. Nagahalina man sa militar ang mga armas kag bala sang mga bandido.

Namatay sa isa ka napaslawan nga "rescue operation" sadtong Hunyo 7, 2002 sa Zamboanga ang asawa ni Gracia nga si Martin nga kadungan niyang nabihag. Naigo man si Gracia sa batiis kag namatay ang isa ka Pilipinang nars.

Daan na nga ginbuyagyag sang iban pang bihag kag ni Fr. Cirilo Nacorda, kura paroko sa Lamitan, Basilan ang kumplutanay sang militar kag Abu Sayyaf. Suno kay Fr. Nacorda, hungod ginpapalagyo sang AFP ang mga bandido sang salakayon ang Lamitan sadtong 2001. Ugaling wala sing may natabo sa imbestigasyon nahanungod sa ila mga reklamo.

Bangud sa mga ginbuyagyag ni Burnham, nagpasa sang resolusyon ang isa ka kongresista agud buksan liwat ang imbestigasyon sa insidente sa Lamitan. Samtang, plano nga ipatawag sang senado ang mga upisyal nga nalamita sa nasambit nga insidente. Lakip diri sanday Maj. Gen. Romeo Dominguez (hepe subong sang Northern Luzon Command), Col. Juvenal Narcise kag Maj. Eliseo Campued.

## Dean Malay, nagpanaw na

NAGPANAW na sa edad nga 89 si Dean Armando J. Malay sining Mayo 15. Nagbilin siya sang mabinulawanon nga rekord sang anum ka dekada nga paghimakas bilang makabanwang peryodista, aktibista kag tagasakdag sang tawhanon nga kinamatarung.

Nagsugod bilang reporter si Malay sadtong 1935. Bangud sa pagbatu sa diktaduryang Marcos, ginpriso siya upod ang bilog nga istap sang peryodikong *WE FORUM* sadtong 1982. Gindula ang ila kasong subersyon pagkatapos sang EDSA I sadtong 1986.

Upod ang mga progresibo kag rebolusyonaryong pwersa, gintukod ni Malay ang pila ka organisasyon sang tawhanon nga kinamatarung agud pangapinan ang mga kinamatarung kag kaayuhan sang pumuluho. Mahaba kag mabinungahon man ang iya suod nga pagpakig-abyan sa Partido. (*Magapagguwa ang AB sang mas malawig nga artikulo bahin kay Dean Malay sa masunod nga isyu.*)

## Lider mangunguma, ginsalbeyds

NAKIT-AN nga patay sang iya mga himata sadtong Mayo 9 si Melencio Gloriani, 51, upisyal sang Kalipunan ng mga Magsasaka sa Kabite-KMP, pila ka adlaw lamang matapos dakpon siya sang Philippine National Police (PNP). Tadtad sang mga bala ang iya lawas sang makit-an ini sa Sityo Kapantayan, Barangay Bucal, banwa sang Maragondon, Cavite.

Samtang, ang duha niyang kaupod nga aktibistang mangunguma nga sanday Ronilo Pagao, 22, kag Gerry Ciacos padayon nga nakahunong sa Camp Pantaleon, Imus sa akusasyon nga mga katapu sila sang Bag-ong Hangaway sang Banwa.

## Sentenaryo sang kamatayon ni Mabini, gindumdum

GINDUMDUM sining Mayo 13 ang sentenaryo nga kamatayon ni Apolinario Mabini, nga kilala bilang "Dungganon nga Paralitiko." Ginbun-ag si mabini sadtong 1864 sa Tanauan, Batangas. Bisan halin sa imol nga pamilya, nakatapos si Mabini sang abogasya sadtong 1894 bangud sa iya pagtinguha.

Bangud sa iya balatian, nangin paralitiko siya sadtong Enero 1896. Sa pihak sang iya kahimtangan, ginhunong siya sang mga kolonyalistang Espanyol umpisa 1896 tubtub 1897 bangud sa kaangtanan niya sa Katipunan.

Nagserbi siya nga punong ministro sang Unang Republika sang Pilipinas sang gindeklarar ini sadtong 1898. Nadakup siya sang mga kolonyalistang Amerikano sadtong 1899 kag gindistyero sa Guam.

Ginpabalik siya sa Pilipinas sadtong 1903 kag pilit nga ginpasumpa sa banderang Amerikano. Indi pareho sa ibang upisyal sang Unang Republika, wala magluhod si Mabini sa dumuluong nga mananakop tubtub nga mamatay siya sa balatian nga kolera sadtong Mayo 13, 1903.



## Paglapas sa Tawhanon nga Kinamatarung, nagalala sa Rehiyon 11

GIN-AKO mismo sang Commission on Human Rights nga nagasaka ang numero sang mga kaso sang paglapas sa tawhanon nga kinamatarung sa Rehiyon 11 sa Mindanao. Sa unang kwarto sining tuig, 67 kaso na ang ginpasaka-mas mataas sang 116.13% kumparar sa pareho nga panahon sang nagtaliwan nga tuig. Mga kaso ini sang tuyo nga pagpatay (12), pagpanakit (17), pagpamahug (6) kag ang iban mga kaso sang pagpamaril, pagpangbomba, arson, pagpanglugos, pagpang-ipit, pagkuot, iligal nga pagpangdakup kag iligal nga detensyon.

## Himbunanay sang Banez-AGILE, nabuyagyag

GINBUYAGYAG sang isa ka kongresista ang himbunanay sang anay *commissioner* sang Bureau of Internal Revenue (BIR) nga si Rene Banez kag sang AGILE, isa ka institusyon nga gintukod sang US CIA, nga waskon ang BIR kag tukuron ang Internal Revenue Management Authority agud taguon ang dalagku nga anomalya sang mga upisyal sini.

Ang paghatag ni Banez sang binilyon nga pisos nga *tax break* sa Metro Pacific Group of Companies, nga gintrabahunan anay niya, ang isa sa mga kabangdanan sang pagbagsak sa kuleksyon sang BIR sadtong nagligad nga tuig, siling ni Aniceto Saludo sang Southern Leyte. Ginatantya nga maabot sa P38 bilyon ang wala makolekta nga buhis bangud sa anomalya nga ini. Sa idalom ang higante nga mga kumpanya pareho sang PLDT, Smart, Piltel, Fort Bonifacio Development Corporation kag Negros Navigation.

Suno sa kongresista, ginapagguwa sang rehimen nga sala sang mga ordinaryong empleyado sang BIR ang pagbagsak sa koleksyon agud tabunan ang pagpangurakot ni Banez.

## Kontrata sang PIATCO, ginbale-wala

PAGKATAPOS hukhukon kag pangin-puslan, dalayon nga ginbale-wala sang rehimeng Macapagal-Arroyo ang kontrata sang Philippine International Air Terminals, Inc. (PIATCO) nga amo gintugyanan magtukod sang NAIA Terminal 3. Sadtong nagtaliwan pa nga tuig gusto sipaon ni Macapagal-Arroyo ang pamilya Cheng, ang pangunahon nga namuhunan sa proyekto, bilang pabor kay Lucio Tan nga buot magkontrol sa tanan nga terminal sa internasyunal kag lokal nga hulugpaan. Sa pagbale-wala sang Korte Suprema sa kontrata sining Mayo, libre katama nga magsulod kag magpanginpulos ang grupo ni Lucio Tan sa him-os na nga NAIA Terminal 3.

Gina-insister sang PIATCO nga bayaran sang gubyrno ang masobra \$500 milyon nga gingatos sini sa pag-obra sang terminal. Pat-ud nga mabusog na naman sa minilyon nga dolyar si Macapagal-Arroyo kag iya mga kakumplot sa natalana nga negosasyon para sa "reimbursement" sa gingastos sang PIATCO.

## Saudi Arabia, Chechnya, Morocco gintublag sang mga pagpangbomba

NAGASULUNOD ang pagpalupok sang mga bomba sining Mayo sa Saudi Arabia, Chechnya kag Morocco nga nagsamad sa pila ka gatos katawo, luwas pa sa mga pasilidad. Ang mga gimbomba nga lugar lunsay sakup sang mga pungsod nga nagpangindi sa gera sang US batuk sa Iraq.

Gilayon ginpasibangdan sang US ang al Qaeda sa mga pagpangbomba nga ini. Ugaling mabaskog ang suspetsa nga kahimuan ang mga ini sang mga operatiba pangsaywar sang US Central Intelligence Agency. Ini agud silutan ang mga pungsod nga wala magpasugot sa pagpanggera sa Iraq kag mahatagan-rason ang padayon nga presensya sang mga tropang Amerikano sa Middle East kag Central Asia.

Masobra 40 katawo ang namatay kag madamu ang napilasan sa nagsulunod nga pagpangbomba sa apat ka lugar sa Cassablanca, Morocco gab-i sang Mayo 16. Lumupok naman ang duha ka bomba sa Chechnya sadtong Mayo 13 nga ginkamatay sang 54 kag nagpilas sang 110. Sadtong Mayo 12, tatlo ka bomba ang lumupok sa Riyadh, Saudi Arabia nga ginkamatay sang 34 kag ginkapilas sang masobra 100.

Ang pagpangbomba sa Saudi Arabia amo ang pinakauna nga atake batuk sa mga Amerikano kag iba pang dumuluong umpisa sakupon sang mga tropang US ang Iraq. Bag-o ini, ginademanda na sang gubyrnong Saudi ang pagpahalin sa mga tropang Amerikano sa pungsod bangud mitsa ini sang nagadalom kag nagalapad nga sentimyentong anti-US sa Saudi Arabia.

Samtang, isa ka malapit nga alyado sang US ang Morocco, pero nangin mabaskog ang pagpamalabag sini sang salakayon sang US ang Iraq.

Ang Chechnya naman isa ka *autonomous* nga republika nga sakup sang Russia sadtong nagaluntad pa ang Union of Soviet Socialist Republics (USSR). Nagdeklarar ini sang independensya pagkatapos mabungkag ang USSR pero ginsakup ini sang Russia sadtong 1994.

Nagalunsar ini subong sang gera para sa pungsodnon nga kahilwayan batuk sa Russia.

Mabaskog man ginapamatukan sang Russia ang gera sang US sa Iraq. Ginahimo nga tapalan subong sang US ang pagpangbomba sa Chechnya agud pat-uron ang kooperasyon sang Russia sa pangkalibutanon nga gera batuk sa "terorismo" nga ginaduso sang US.

## **Indonesia nagdeklara sang layi militar sa Aceh**

NAG-ABOT sa 45,000 tropang Indones ang naglusob sa Aceh pagkatapos ideklarar diri sang Indonesia ang layi militar sining Mayo 19. Ginhimo ang deklarasyon pagkatapos nagpalyar ang negosasyon sa tunga sang Free Aceh Movement (GAM) kag sang gubyernong Indones bangud sa padayon nga panindugan sang GAM para sa kahilwayan tigaylo sang awtonomya. Ginatapalan sang Indonesia ang kuno pagsunog sang GAM sa 30 eskwelahan.

Halos 27 tuig na nga ginapakig-away sang GAM ang kahilwayan sang Aceh. Ang prubinsya, nga ara sa naaminhan sang pungsod, estratehiko para sa Indonesia kag mga imperyalistang pungsod bangud manggaranon ini sa langis kag natural gas.

## **North Korea, nagbiya sa kasugtanan batuk sa mga armas nukleyar**

NAGBIYA sining Mayo 13 ang North Korea ukon Democratic People's Republic of Korea (DPRK) sa kasugtanan sa tunga sini kag sang South Korea nga nagadumili sang mga armas nukleyar sa bug-os nga Korean peninsula. Siling sang DPRK, nangin walay pulos na sa US ang nasambit nga dokumento.

"Sistematiko kag lubos nga ginguba sang administrasyong Bush ang proseso sang denukleyarisasyon sang Korean peninsula," pahayag sang DPRK. "Gani nangin isa na ka patay nga dokumento ang deklarasyon sang denukleyarisasyon sang Korean peninsula." Pila ka bulan nga ginapresyur sang US ang North Korea agud piliton ini nga ibasura ang programang nukleyar sang pungsod. Nagapanindugan ang North Korea nga ang pagarmas sini amo ang makapugong sa pamahug nga agresyon sang US.

## **Pagkakas sa CPN (M) sa listahan sang mga terorista, ginpanawagan**

KWARENTA'Y singko nga partido kag organisasyon halin sa nagkalain-lain nga pungsod ang nagapanawagan sining Mayo 4 nga kakason ang Communist Party of Nepal (Maoist) ukon CPN (M) sa listahan sang US nga kuno mga terorista.

Ang nasambit nga organisasyon, lakip ang NDFP, partisipante sa Ika-12 International Communist Seminar nga ginhiwat sa Brussels, Belgium.

Ginlakip sang US ang CPN (M) kag ang ginapamunuan sini nga

United People's Front (UPF) sa listahan sang mga "terorista" sadtong Abril 30. Tuyo sang tikang nga ini sang US nga sablagan ang ginahiwat nga sugilanon pangkalinungan sa Nepal.

Nagpanawagan man ang 45 organisasyon nga palayason sa Nepal ang 48 Amerikanong nga adbayser militar sang reaksyunaryong gubyerno. Nagpabutyag sila sang pagsuporta sa proseso pangkalinungan sa Nepal.

## **Kumander sang mga tropang US sa Iraq, ginkasuhan**

GINKASUHAN sining Mayo 14 sang 19 Iraqi si Gen. Tommy Franks, kumander sang mga Amerikano sa Iraq, kag iban pang upisyal militar sang US sang mga krimen batuk sa katawhan. Kalakip sa mga igakaso sa ila ang wala kaluoy nga pagpatay sa mga sibilyan nga Iraqi, ang pagpangbomba sa isa ka tindahan, pagtarget sa mga ambulansya kag wala pagpugong sa malaparan kag wala kutod nga pagpangawat sa mga ospital. Malig-on ang ebidensya nga wala lamang ginpabay-an sang US ang lapnagon nga kinawatay kundi ginaengganyo pa ini.

Ginpasaka sang abugado sang mga Iraqi nga si Jan Fermons ang kaso sa Begium sa idalum sang layi sang pungsod nga nagatugot nga bistahon sang mga korte nga Belgian ang sin-o man, bisan mga dumuluong, para sa krimen panggera diin man nga bahin sang ini natabo.

Agig nga ginpaandaman sang US ang gubyernong Belgian batuk sa pagpresentar sang kaso. Sa subong, nameligro nga mabale-wala ang kaso bangud sa probisyon sa layi sang Belgium nga kon ang mga nademanda halin sa isa ka "demokratikong" pungsod, mas maayo nga didto sa amo nga pungsod igakiha ang kaso.

## **France, ginparalisa sang welga**

BUG-OS nga adlaw nga paralisado ang France sining Mayo 13 sang magwelga ang maabot sa duha ka milyon nga mamumugon batuk sa bag-o nga sistemang pensyon sang gubyerno. Maabot sa 80% sang mga byahe nga internasyunal kag lokal ang nakansela. Nag-untat man ang mga byahe sang mga barko kag tren. Nagsara ang madamo nga

ospital kag eskwelahan kag ang serbisyo koreo. Ginatantya nga maabot sa 700,000 ang nagpasakup sa 100 aksyong protesta sa bug-os nga pungsod.

Nagwelga ang mga mamumugon agud pamatukan ang bag-o nga rekisito sang pagtrabaho sang dugang nga duha kag tunga ka tuig antes makaretiro kag makuha sang bilog ang ila pensyon.

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXIV No. 8  
Mayo 21, 2003  
[www.philippinerevolution.org](http://www.philippinerevolution.org)

*Editorial*

# Suportahan ang paghimakas sang pumuluyong Moro batuk sa nagasingki nga atake sang rehimeng US-Arroyo!

**P**AGKATAPOS gindeklarar nga "terorista" sang US kag sang rehimeng Arroyo ang Partido Komunista sang Pilipinas kag Bag-ong Hangaway sang Banwa, ang Moro Islamic Liberation Front (MILF) naman subong ang gusto nila bilangon sa ila listahan sang mga "terorista." Pormalidad na lamang ini bangud sa buhat sang US kag sang rehimen madugay na nila ginakabig nga "terorista" ang MILF. Ginapabugal pa sang rehimeng Arroyo nga indi na kinahanglan ideklara nga terorista ang MILF agud makakuha sang pondo sa US kag padayunon ang todo-gera batuk diri sa idalum sang palso nga "gera kontra-terorismo" sang imperyalismong US.

Maathag ang plano sang huyog nga ini. Ini agud hatagan-rason ang dugang pa nga armadong interbensyon sang US, nga plano sining umpisahan paagi sa pagpadala sang mga Amerikanong tropa pangkombat sa mga lugar nga ginahulagan sang MILF sa Mindanao, luwas pa sa mga lugar sang bandidong Abu Sayyaf. Sa ulihi sakupon pati na ang mga teritoryo sang Bag-ong Hangaway sang Banwa.

Agud may ara sang sandigan ang deklarasyon nga "terorista" ang MILF, ginahimo sang US paagi sang *terrorist cell* sini sa Pilipinas ang serye sang mga pagpangbomba sa nagkalain-lain nga lugar sa Mindanao. Ginkumplot diri si Defense Secretary Angelo Reyes. Makangingil-ad ang sunod-sunod nga pagpangbomba sa mga syudad sang Davao kag Koronadal halin Marso tuhtub Mayo. Masobra 50 inosenteng sibilyan ang namatay kag ginatos-gatos ang napilasan sa mga teroristang atake nga ini.

Gilayon ginpagguwa sang rehimen ang akusasyon nga ang mga pagpangbomba kahimuan sang magkahimbon nga MILF-BHB-Abu



***Mga tampok  
sa isyu na ini...***

**Bt Corn: makahililo  
nga mais sg Monsanto**  
PAHINA 3

**Ka Elvira,  
mapinalanggaon nga  
rebolusyonaryo**

PAHINA 6

**Tabingi nga dalan  
padulong sa kalinu-  
ngan sa Palestine**

PAHINA 7